Seigeigéi Dzantik'i Héeni, 1982

Aaa, ax t'aakx'í tléix' Dikaankáawooch yaax' tl'átgi káa yan haa uwatée. Aaa, yú Book of Life yoo duwasáakw Bible haa jéex' ldakát uháan. Chácht yoo too.átgi haa ée dultóow. A káx' áyú yei <u>x</u>'aya<u>k</u>á Dikaankáawu s'e "Shux'áanáx." Ach áyá ax toowú yéi yatee yá yeedát. 10 Aaa, ax Aankáawu du ée axahéen yá diyéex'. Ch'a uwaayáa yá tl'átgi káx' haa xoo yaa woogoodi yéx haa xoowú a haa Aan<u>k</u>áawu. Haa téix' du yinaadéi téeyee awsikóo tlek'gaanáx haa teeyí haa tundatáani wáasá yatee. Ka yá du x'úx'u káa yéi yatee wóoch káx' x'anáx tudagáax' 20 aagaa áyá yéi haa kgwanéi<u>x</u>, <u>ka wóoch gaxtoosx</u>án. Tláx wáa yak'eiyi átx sá sitee du aaní káx' yá haa Aan<u>k</u>áawu. Aaa, yá aa<u>x</u> haat <u>x</u>at kawdiyayi yé <u>x</u>át, Aalséix áyá aax haat xat kawdiyáa. Aantkeeneex áyú haa satéeyin 30 yóo yú kduneegéen. Ax léek'wch yéi <u>x</u>at gusageink'í tlél <u>x</u>at oolgé Kuchéin yóo dusáagun

Emma Marks Juneau, 1982

Yes, my brothers and sisters, God put us here on this land as one. Yes, we have the Bible called the Book of Life all of us. Going to church, we are taught. There the voice of the Lord said. "Put me first!" This is why I feel like this today. Yes. I believe 10 in my Lord down here. It is as if our Lord is still among us as he walked the earth before. When our hearts are toward Him, He knows each one of us and what our thoughts are. And in His book it says that we should pray for each other 20 then we will be saved. and we should love one another too. How very fine it is in his land, our Lord's. Yes. this place where I come from, I come from Alsek. It is said we were many people. 30 My grandfather when I was a child, still very small, (his name was Kuchéin)

vú ax léelk'w ax tláa du éesh hú ává du x'éidei xa.áxjin. Aaa, yei kwdzigeiyi aa at yátx'i yax haa wooskeich. Sh kakgwalneegí 40 tlél aadéi gunéi aa ux jixeexi yé uháan. Ayá yáa yeedát ax yátx'i tín kuxa.aagu yóo x'axla.átgi. T.V. dultínch. Uháan tlél yéi haa wootee. Tlél, akáa wtudahaan haa léelk'w haa éen sh kalneegí. Áyá yáa yeedát ax daat áyá kaa shoowaxíx. 50 Ch'as ax yátx'i áyá s du een kuxdzitee, yá Lukaax.ádi, yú haa dusáagu yá Alséixdáx. Aaa vá haa kahídi Tsalxaan Hít yoo aa wduwasáa ka Shaaka Hít. Aaa, Tsalxaan X'éen tsu a yee yéi téeyin 60 yá haa kahídi. Aaa ax tuwáa sigóo tsu yá anax kuxdziteeyi yé kxwaneegí. Ax éesh du léelk'w áyá yéi dusáagoon Yaandu.ein, Kaagwaantaan. Yá ax éesh du éesh ku.aa áwés 70 Kaawus.aa yóo duwaasáa. Dax aa du saayí, Kusán yóo duwaasáa.

my grandfather,	
my mother's father,	
he is the one I heard this from.	
Yes, we smaller children	
would sit in a row.	
When he was going to tell stories	40
none of us could get up and run.	
But now,	
when I try talking with my children	
they watch T.V.	
We were not like that.	
No,	
we didn't get up	
during our grandfather's storytelling.	
Today	
my relatives are all dead.	50
There are just my children whom I survived with,	
the Lukaa <u>x</u> .ádi,	
we who are named	
from Alsek River.	
Yes,	
one of our houses	
was named Mt. Fairweather House,	
and Canoe Prow House.	
Yes, the Mt. Fairweather Screen	
was also inside	60
this house of ours.	
Yes,	
I would like	
to tell	
about my origin, too.	
My father's grandfather's	
name was	
Yaandu.ein,	
a Kaagwaantaan.	
My father's father	70
was named	
<u>K</u> aawus.aa.	
His second name	
was also	
Kusán.	

Áhé ax léelk'wx sitee. váax' daak xat wusigút ax léelkw hás eetée. Aaa, has tsu dei yei s shunax'ix yá ax léelk'w 80 yá Yaakwdáatdáx. Ax éek'x tsú sitee. Aaa, ch'a haa shagoon aya wooshkaadax yoot kawdzi.aa. Ach áyá yá yóox' yoo x'eiwatani aa tsú ax éek'x sitee. Aaa, yáaťaa, váat. Ax kéek' áhé. Ax éesh du kéilk' du sée áhé. 90 Ganákť yóo dusáagoon. Ka ax toowu yak'éi yáa yeedát xát tsú yee xóo axwalgeiní ka yá ax aani kwáani has du xóo xat kawuhaayi. Aaa, first time ku.a ává yoo x'axaatank véi vateeyi véix'. Yei at duwasáakw 100 at kuxlakéivin ávú. Aa kushayadiheini yé tléil ax tuwáa ushgú ax ya xwagoodí. Dleit káach yéi yasáakw "shy." Tléil school vóo xwagoot ch'á axoo aa kwa xwsikóo. Aaa. tsú kakkwanéek va ax tláa yinaanáx ax léelk'w yinaanáx. Ax tláa du tláa saayéex áyá xat sitee. Seigeigéi yóo wduwasáa 110 ax tláa du tláa. Ax tláa kwá Leetkwéi yú duwasáa. Áyá yá ax saayí ku.a áyá Teikweidí yádix wusitee, Yaakwdaat aa. Ax tláa ku.a hés Shangukeidí yádix wusitée.

This is my grandfather who brought me out, my grandparents' descendant. Yes, they too are fast passing away, 80 these my grandparents from Yakutat. He is also my younger brother. Yes, our ancestors' lives branched off from each other. That is why this one who spoke over there is my brother, too. Yes, this one here. She is my younger sister. She's the daughter 90 of my father's nephew. His name was Ganákť. And I am feeling happy at this moment that I too look among you and these my people that I am among them. Yes, I'm speaking for the first time on an occasion such as this. I was what is called 100 being shy. I didn't want to pass by where there are a lot of people. In English they call it "shy." I did not attend school, but I do know a little English. Yes. I will also explain my mother's lineage, my grandmother's lineage. I am my mother's mother's namesake. Seigeigéi 110 was her name, my mother's mother. But my mother's name was Leetkwéi. My namesake was a child of the Teikweidí of Yakutat. But my mother was a child of Shangukeidí.

Ax éesh ku.a áwé Naagéi yóo wduwasáa, Yéil Éesh. Nás'k 120 du yáa wootee. Kinaadakeen. Yéi áyá kdulnéek yú haa aaní. Ax áat áyú xáan sh kalnik noojéen. Yú dakkaadéi Aalséix yík tulatsa<u>k</u> ganugún. Aaa, gil ayu akaanáx yan kaawa.áa yu.á ya Aalséix. 130 Tlél a tayeenáx shaa; kaanáx áyá xtoo.átch. Yú yaakwx' anáx gatula.átch. Yaax' áwé kúxdei haa yakwdaháaych. Ya síť tayeenáx yóo áwé yaa haa axsagúkch, yaakwx'u yikt. A tayeenáx yaa haa gasagugún áwé lk'wáa aan gunein áwé ayée ktudanákch wé yaakw, al'eix. At dushée nuch. 140 Yéi áwé xwsikóo. Aaa, yá ax yátx'i yáat han áa yá ax sée. Jilkáatnáx áhé kuwaháa du léelk'w. Jakwteen yóo dusáagun yá du léelk'w wé has du léelk'w. yá ax xán.aa du éesh. Xunaanáx ku.aa awés sháawat dú léelk'w ku.aa áwé Táx' Hít Taan yádix wusitée, ach wuskóowu yáadu. 150 Táx' Hít Taan yádix áwé wusitee hú ku.aa. A tóodei áhé has kuwaháa yá Xunaa tóodei tsú, <u>k</u>a Jil<u>k</u>áat. Yéi áwé has kaawahaa a<u>x</u> yatx'i. Ha, ax tuwóo yak'éi

My father's name was Naagéi, and Yeil Eesh. He had three 120 names. Kinaadakeen. This is the way it's told about our land. This is the way my paternal aunt would tell it to me. We would pole our way up the Alsek River to the Interior. Yes, a cliff of ice ran across this river the Alsek River. 130 We did not go under; we went over the mountains. We would carry our boats over. At this point we would return. We would float down underneath the glacier in the boats. When we floated out from underneath, when nothing had happened to us we would stand in the boats and dance. We would sing. 140 This is the way I know it. Yes, these children of mine: the one standing here is my daughter. Her grandfather is from Chilkat. Her grandfather's name was Jakwteen, their grandfather, my husband's father. Their grandmother, however, is from Hoonah. And she was a child of the Snail House; there are people here who know this. 150 She was a child of the Snail House. They are related to both Hoonah and Chilkat. These are my children's relatives. Now, I'm happy

xat tsú ch'a yéi yiguwáatl'
gaaw ax jeet yeeyteeyí.
Tlél yéi kooxwají
yá yeedát yáa wóosh kaanáx kugawdahaayi
yáax' yoo x'akkwtaaní.
Ha "Gunlchéesh" yóo kwa
daayaxaká hé ax léelk'w
xat wusaayí.
Yéi áyá kakkwalagéi.
Gu.aal kwshé Dikaankaawu haa eenx wusteeyik tsu
next year yís.
Yéi awé.
Sh tugáa xat ditee.

Shax'saani Kéek' Deishú, 1985

Ax tuwáa sigóo yee éen at kaxwaneegí ax sisdees. Ax toowú yak'éi, aaa, hóoch'i gaawú yaa kunaxlaséin (<u>x</u>at yeeytéen) aax yá gaaw yee tuwaá sigóo yeeysakoowú vá aan xat kawdudlixedli át. Tléil yaa u<u>x</u>shagé. Ax tuwáa sigóo goot kaach wuskoowú. Aaa, shux'áanáx ax tláa, Sitgeedá<u>x</u> áwé, ax éeshch uwasháa Tlákw.aandéi. Ax' áwé kuxdzitee. Ax aat hás jeedáx atwuskú áyá. Yá gaaw

10

160

197

160

that you allowed me some time too.

I didn't think that I would speak here today where we are all gathered together.

And I say, "Thank you" to this grandfather of mine for calling me.

This will be the extent of my speech.

My hope is that God will be with us again next year.

This is all.

I am thankful.

Jennie Thlunaut Haines, 1985

I would like to tell you something, my sisters. I am happy, yes, as I am coming close to my final hour (you can see my condition) that at this time you want to learn this weaving I was blessed with. I don't want to keep it to myself. I want someone else to learn. Yes, to begin with, my father married my mother, who was from Sitka, and they moved to Klukwan. I was born there. This is the art of my paternal aunts. My father's sister

10

yá blanket	
a <u>x</u> éesh dlaak'	
yéi dusáagun	
Deinkul.át.	
Dú jeedá <u>x</u> atwuskú áyá	
a <u>x</u> jee yéi wootee.	
Tlél aan kukin xat x'eití.	
A <u>x</u> tuwáa sigóo	
a <u>x</u> xooni <u>k</u> áach wuskoowú.	30
Ha yá gaaw	
gunalchéesh.	
Yéi yoo yee kayasheik a <u>x</u> <u>x</u> ándéi.	
Aaa,	
aadéi shtugáa <u>x</u> at ditee.	
Áyá ax Aankáawooch aan xat kawlixétl	
yá yéi jiné.	
Aaa,	
yá gaaw <u>k</u> u.aa,	
tlél ch'a koogéiyi.	40
Ch'a yéi xat gusagenk'idáx	
ax cháchi	
áa xat shukawajeis' ax tláa,	
ka ax éesh;	
Wednesday <u>k</u> a Sunday	
yaa xat jigatánch cháchdei.	
Aa <u>x</u> yá gaaw	
yá aan xat kawdudlixetli át.	
Gunalchéesh,	
yee tuwáa sagoowú.	50
Ha gu.aal kwshé	
Dikaankáawux' yan tuytán x'wan,	
aa yan na <u>x</u> yidlaa <u>k</u> .	
Aaa Yáat'aa	
dei du ée at xalatóowun.	
Haa yá gaaw áwé	
gunalchéesh yéi ax toowú yatee,	
a <u>x x</u> ándei yéi yee kasheigí.	
Aaa, Dikaankáawu éex kwá gayisgáax	
yana <u>x</u> yidlaagí	60
yá akáx haat <u>k</u> ayeeytini át.	

at the time of that blanket was called Deinkul.át. This is the art from her that was passed to my hands. I'm not stingy. I would like someone like me to learn it. 30 Now at this time thank you. You have experienced hardships to be with me. Yes, I'm grateful for this. God gave his blessing to me for this work. Yes. and I want to tell you now 40 none of this was by accident. From when I was little my mother and my father instructed me on where my church was; Wednesday and Sunday she would take me by the hand to church. From that time to this I have been blessed with this weaving. Thank you 50 for wanting it. My hope is you will have faith in God, that you will learn. Yes, I have been teaching her already. Now, at this time, I feel thankful that you have experienced hardships to be with me. Ask our Lord above 60 to learn what you came for.

Yéi áwé ax tundatáani vatee yáa vagiyee, aadéi sh tugáa xat ditee. Aaa, ax gaawú uwayáa yaa kunayach'i yáx yatee. Shux'áanáx 1901 áwé ax tláa ax éeshch áwé akaa koowakéi. Ax tlaak'w yéi duwasáakw, Saantáas'. Áwé 70 véi wé dulgeis'ín: fifty dollars one blanket. Yéi áwé x'alatseenín. A jeet awatée wé fifty dollars ax tláak'w jeet. Aagáa áwé ax tláa ee awlitúw. 1901. Tlél veedadi váx. Shaax'sáani 80 át luwugook ch'áakw. Gwál ch'a <u>x</u>át giwé yéi <u>x</u>at wuduswáat. "Haagú!" Any time you start it. "Haagú!" Ayá du déix'i kanúkch. I am watching what they're doing. 1908 áwé woonaa ax tláa. Aagáa áwé yan akawsinéi yóot'aa yáx, black and yellow. 90 All mine. Ax éeshch a<u>x</u> jeet uwatée. Dei kwá xashigóok. I know how to weave. Aanáx áwé ax léelk'w ax éesh du tláa hooch áwé shux'áanáx ax ée awlitúw. 100 1908,

This is how I feel today, I'm grateful for this. Yes, my time seems to be getting short. In the beginning, in 1901, my father paid for my mother's instruction. My maternal aunt was named Saantáas. 70 Then. they used to pay this much for it: fifty dollars for one blanket. This was the dollar value. He gave the fifty dollars to my aunt. This was when she taught my mother. 1901. It wasn't like now. 80 The young girls didn't run around long ago. Maybe it was only me that was raised this way. "Come here!" they'd say every time they began weaving. "Come here!" I would sit behind her. I'd watch what they were doing. My mother died in 1908. This is when she finished weaving it, like that one, black and yellow. 90 All mine. My father gave it to me. I already knew how to weave. I knew how to weave. After this my grandmother, my father's mother, was the one 100 who first taught it to me. in 1908,

Porcupine gold mine-ix' tle all summer áwé yan kaxwsinéi, tléix' kutaan. Yawdi.aa wéit'át; it's a slow job. Axoo aa yú lingít two years x'áak aksané. Aa yei gaxyisatéen aadéi lich'éeyagu yé. Aax yan néi yéi áwé wududzigéy fifty dollars. Déix, I got two twenty	110
and one ten,	
gold. Aagáa áwé	
shux'áaná <u>x</u> a <u>x</u> <u>x</u> án.aa	
"take good care of that money.	
Don't use it."	
Yéi wooyáat' aagáa	120
a <u>x</u> jee yéi wooteeyi yé,	
wé naaxein yeidí.	
Aaa, yáa yeedadi <u>k</u> áawu dáanaa yaa ayakanadlá <u>k</u> .	
They spend it right away.	
Ha yéi sh kadulneek á yahaayí <u>k</u> udzitee dáanaa. Sh tóon yoo diteek <u>k</u> óodá <u>x</u>	
l áyáa ayaduneiyí.	
Ách áwé	
tsu xwahooní	
a <u>x</u> naaxeiní	130
I keep the money for two, three months	
or four months.	
Ách áwé yeedát tlél <u>k</u> 'anashgidei <u>x</u> <u>x</u> at ustée.	
Aaa,	
a <u>x</u> éesh hás,	
a <u>x</u> aat hás jeedá <u>x</u>	
atwuskú áwé.	
Ách áwé ayaa awuxaanéi.	
Ha yá gaaw ku.aa ax tundatáani ax x'agáax'i yéi yatee, ch'a aadooch sá yan gadlaagí	140
yáa yéi daa <u>x</u> ané át.	170
Kanay.aakw yee Aankaawoox' yan tuytán	
, <u> </u>	

at Porcupine gold mine I weaved all summer and finished it in one summer. Those things take time; it's slow work. It takes some people two years to weave one. Now you'll all see how slow it is. When it was finished 110 it was bought for this much: fifty dollars. Two, I got two twenties and one ten, gold pieces. This is when my first husband said to me "Take good care of the money. Don't spend it." 120 I kept the money for a long time then, the money from the naaxein. Yes, people of today, as soon as they make the money they spend it right away. Well, they say money has a spirit. You can offend it if you don't respect it. That's why when I sold 130 my naaxein I kept the money for two, three, or four months. This is why I'm not a poor person. Yes, this art is from my fathers and my paternal aunts. Because of this I respect it. And now at this time my thoughts are, my prayers are, 140 that someone master the things that I do. Try to concentrate on your Lord

aa yanax yidlaagi. Yéi áwé áwé aadéi yoo kawaneiyi yé wé naaxein. Tlákw.aannáx áwé kuwdzitee. Gaanaxteidí vóo s duwasáakw ax éesh hás. Hásch áwé s aawasháa Tsimshian woman. 150 Yéi áwé du saaví tlél du káx xat seix aakw. Yéi áwé wduwasáa Hayuwáas Tláa. I remember the name. Hayuwáas Tláa jeedáx atwuskú áwé first in Tlákw.aan. Kux has akawsikéi wé naaxein. Ch'u yeedát áwoo á. 160 They got it. Martha Willard got it, that blanket. First blanket from a Tsimshian. Áwé kux has akawsikéi. Ch'as ax aat hásx siteeyi áach áwé has awshigóok. Yaax' áwé s du kaani yán ee s awlitúw, yá uhaan. Yanwaa Sháa ee s awlitúw. Ách áwé yéi duwasáakw 170 Jil<u>k</u>áat Blanket. Tlél tsu Sitka. tlél tsu Hoonah, tlél tsu goox' sá yéi daaduné. Only Tlákw.aan. That's why they call it Jilkáat Blanket. Ha yéi áwé yee tóo yéi kgwatée. I don't know why they lost the art wé Tsimshian ku.aa. Tlél yeedát 180 I don't see somebody make it like that. Aaa

so that you'll master it.	
This is the way	
it happened with the naaxein.	
It came through Klukwan.	
My fathers are called	
Gaanaxteidí.	
They were the ones who married	
the Tsimshian woman.	150
This is why	
I don't forget her name.	
Her name was	
Hayuwaas Tlaa.	
I remember the name.	
This is art from Hayuwáas Tláa	
first done in Klukwan.	
They unraveled	
the naaxein.	
It's still there now.	160
They have it.	
Martha Willard has	•
that blanket.	
The first blanket from a Tsimshian.	
They unraveled it.	
Only those who were my paternal aunts	
learned it.	
Then they taught it to their sisters-in-law, to us.	
They taught it to the Yaanwaa Shaa.	
That is why it's called	170
Chilkat Blanket.	170
It wasn't made in Sitka,	
or Hoonah,	
,	
or anywhere else.	
Only in Klukwan.	
That is why it's called Chilkat Blanket.	
This is what you will keep in mind.	
I don't know why the Tsimshians	
lost the art.	100
I don't see	180
anyone now	
making them like that.	
Yes,	

yá gaaw <u>k</u>u.aa a<u>x</u> toowú yak'éi, yee tuwaa wusgóowu. A<u>x x</u>'agáax'i yéi yatee ch'a aadóoch sá yawudlaa<u>g</u>í. Aaa yéi áwé.

Shax'saani Kéek' Deishú, 1985

X'agaax' kwa yéi kkwasanéi. Haa Aankáawudéi tunaydataan.

Lord, Dikaankáawu, ax s'aatí, gunalchéesh yá s'ootaat ax yéi jineiyi aan xat kaylaxeidléen; aat<u>x</u> yá gaaw ax sisdees ka ax dachxanx'i sáani hásch tsu sh too s akgwaltóowu yá s'ootaatdáx. Wa.éich has du yaa koosgeiyí too yéi inati x'wán. Dikaankáawu, ch'a daakw aach sá yan gadlaagí. Yá yéi da<u>x</u>ane át de aan gukwagóot, ax Aankáawu. Tléil <u>k</u>wa yaa u<u>x</u>shagé; a<u>x x</u>ooni <u>k</u>áach <u>k</u>wa gaa<u>x</u>shagóogu yá s'ootaat ax x'agaax'i yéi yatee, i yéet Jesus saayí tóonáx. Amen.

but now I feel good that you have wanted to do it. My prayer is that someone learn it. Yes, this is how I feel.

Jennie Thlunaut Haines, 1985

I will offer a prayer. Lift your thoughts to our Lord.

Lord! God above. my master, thank you, this morning for my work that you have blessed me with; that now my sisters and my grandchildren are also going to learn from this morning on. Please have them keep you in their knowledge. Lord above, let whichever of them learn. This work that I do, I'm going to go with it soon, my God. But I don't want to keep it to myself; instead, that someone like me learn it, is my prayer this morning, in the name of Your Son, Jesus. Amen.

Shax'saani Kéek' Tlákw.aan, 1985

Ax tuwáa sigóo x'axwdataaní. Tlákw.aan Sisterhood, gunalchéesh, aadéi ax éet yeeydishiyi yé, aaa, yee xoonix xat sateeyéech áwé. Ax toowú yéi wootee, vee een sisterhood xat sateeyéech. Yá xáanaa gunalchéesh, 10 aadéi ax eet yeeydishiyi yé, <u>k</u>a yá haat kuwatini aa, aadoo sá yá naaxein yéi adaané. X'oon gunalchéesh á. Ch'a oowayáa tlél tooxwanookw. Tlákw <u>xat yanéekw</u>, ka ekskóos yéi daaxané. Ch'a aan áwé 20 has du tuwáa sigóo wé dleit káa ku.aa kooxlatóowu wé át. K'e yáa yeedát Dikaankáawudei tuxatán yan <u>k</u>adlaa<u>k</u>. Yá déix yagiyee uxsayéx. Yee eedéi sh tugáa xat ditee ldakát all of you girls aadéi ax een yéi jiyne yé. 30 Aaa, yá xáanaa aadéi ax daa yee tuwateeyi yé yáx ax een yéi jiyiné, Tlákw.aan Sisterhood. Gunalchéesh.

Jennie Thlunaut Klukwan, 1985

I would like to speak. Thank you, Klukwan Sisterhood, for the way you have helped me, yes, because I am your relative. I feel this way because I am in the Sisterhood with you. Thank you, tonight, 10 for the way you have helped me, and those who have come here who are doing Chilkat weaving. Many thanks. It is as if I no longer feel sick. I was sick all the time and kept making excuses. But still 20 the White people wanted me to teach this. For example, now I keep my mind on the Lord that I can finish teaching. There are two more days to go. I am grateful to all of you girls for what you have done for me. Yes, this evening, 30 because of the way you feel about me, you have done this for me, Klukwan Sisterhood. Thank you.

Aaa, yá tsu ax naa.ádi, vá kát aax datéen, yá ax sgóonwaanx'i jeedáx át. Ax jeet wuduwa.áx. Aaa. Ax tundatáani yéi yatee, 40 Gunxaa Guwakaan. (Gunxaa Guwakaan) Áawé. Aan daak kukwagóot i eedéi sh tugaa datí. Wa.é i eenáx yáa yeedát yá yéi jiné ax jee yéi wootee, ka gunalchéesh. Aaa. Ax vátx'u sáani, ax dachxánx'i sáani, 50 gunalchéesh. Oowayáa yeexwshakéeni. Ka wa.é. Ioe Hotch. ax éek'átsk'u. gunalchéesh aadéi ax daa yoo x'eeyatangi yé yá xáanaa. Aaa. Tlél ax tuwáa ushgú 60 yee aanídáx koo at xalatuw yéix' yáaťát l kaa jeet wutooteeyí. Yóo áwé a daa tuxditáan. Ách áyá yeexwshikín, ax sistee. Aaa, yeedát <u>k</u>u.aa ax toowú yak'éi. Tlél waa sá ax toowú utée, tsu a ítx' waa sá xat wuneiyí. Aaa, yá xáanaa gunalchéesh, ldakát yeehwáan 70 yéi yee daayaxaká aadéi ax een yéi jiyeeyneiyí yé <u>k</u>a yá

Yes,	
even the dress	
that's on me now	
is from my students.	
It was given to me.	
Yes.	
Austin Hammond	40
has been on my mind.	
(Austin Hammond) <i>Áawé</i> .	
I will enter the forest	
with my gratitude to you.	
Because of you now	
this work has come to me,	
and I thank you.	
Yes,	
my dear children,	٠.
my dear grandchildren,	
thank you	50
for letting me impose on you.	
And you,	
Joe Hotch,	
my dear little brother,	
thank you	
for the way you have been thinking of me	٠.
this evening.	
Yes.	
I didn't want	
to teach something from your village	60
without our giving this dinner.	
This is how I feel about it.	
This is why I'm imposing on you,	
my sisters.	
Yes, but now	
I feel good.	
I won't feel bad about anything,	
even if something happens to me after this.	
Yes, this evening	
I am saying	70
thank you to all of you	
for what you have done,	
for this,	

Gunalchéesh.

wéit'át vei gaxdusteení. Ax toowú yak'éi. Yáax' daak wus.eení ku.aa shákdéi wé yak'éi. Tsu xat wunawú yóox' yaa kanajux át 80 ldakát yeehwáanch yáax' yoo x'axatángi kaach yei guxsatinch. Tsu xat wunaawú tlél ax kaadéi yisagwax'áakw yéi áwé gwatee wé ax léelk'w hás ádi, ax een yáax'. A yahaayí ldakát lingit aaní tukwáaneech yéi guxsateen. Ax toowú yak'éi aadéi i tundatáani wooteeyi yé. Yá Sítkax' kwa aagaa yak'éiyi 90 picture-x guxsatée wéit át. Wé naaxein tsu. Yax shaysa.áxw. Yéi daaxaneiyéech áwé wé naaxein yáat áach haat yaawaxáa xáach yéi xwsineiyi aa. Á tsú ax tuwáa sigóo yá, yá haa yahaayí teen a káa yéi wooteeyí. 100 Yéi áwé.

this here,	
that people will see.	
I am happy.	
Perhaps it it is best that your things be brought out here.	
Even when I die	
all of you	
who are talking here	80
will see	
that camera running out there.	
Even when I die	
you won't forget me.	
This is how my grandparents' things will be	
along with me here.	
The pictures will be seen by people all over the world.	
I am happy for the way your feelings are.	
Then this	
will be made in Sitka	90
into a nice film.	
This Chilkat blanket, too.	
Hang it over there.	
Because I made this Chilkat blanket	
she brought it here,	
one that I made.	
I would like it also	
to be included with us,	
as part of the picture.	
This is all.	100
Thank you.	

Daanawáa<u>k</u> Fairbanks, 1988

<u>K</u>aa tóot uwagás'.

gadaháan,

Aagáa áyá <u>k</u>aa ya <u>x</u>oot awdligein, <u>k</u>aa ya <u>x</u>oot awdligein yu.á. Aagáa áwé yéi yaawa<u>k</u>aa,

Yáa yeedát ax tuwáa sigóo <u>x</u>'axwdataani. Aaa. ha yá dziyáak áwé i <u>x</u>'éit <u>x</u>wasi.á<u>x</u>, Lyekwudusdéich, i tundatáani aadéi yateeyi yé. Aaa, tsu nisdaat áwé i eet x'axwaatán. Yáa yeedát yáat nak aa hasch tsú s aga.aaxít áwé tsu ax tuwaa sigóo x'axwdataaní adaat. Aaa. tleidahéen áwé yéi at wootee yáa yeedádi yáx. Yándei áwé yaa kunanéin. Wé koo.éex'x' al'eixí sh daat kudushée. Awé wé káa tlax áyú du toowú yak'éi aadéi yándei yaa at nanein yé. Yáax' áwé, du een kawduwaneek. Du xánt aawagút. Aagáa áwé yéi yawdudzikaa, "I kéilk' áyá woonaa." Aagáa yan tawdinúk. Ldakát yá du een al'eixí áyá wookéi.

10

20

Austin Hammond Fairbanks, 1988

as he stood up,

At this moment I would like to speak. Yes, a while ago I listened to you, Lyekwudusdéich, and how you were thinking. 10 Yes, I also spoke to you last evening. In order that these people standing here could hear it too, I would like to say it again. Yes. at one time this happened like now. People were getting ready. People were dressing for a ceremonial, a dance. And this man 20 was very happy the way it was coming along. This was when someone told him. Someone came to him. This was when someone said to him, "Your maternal nephew passed away." This is when he sat down. All the dancers with him sat down. It pierced them. This is when he looked among their faces, 30 he looked among their faces it is said. This is when he said,

"Góok! Góok! Sh daat <u>k</u> aydashéedéi,	
sh daat <u>k</u> aydashéedéi.	
Aan lushgoowu aan yádi nanáach."	
Yei áyá i toowú wootee, Lyekwudusdéich.	
Yáadei, yáat'át yakgwaxeexí	
ch'a uwayáa yáadei yeeteeyi yax áwé wootee.	
Ách áwé wé dziyáak	40
tlél yan kaysheeyí.	
Aaa,	
haa tuwáa sigóo	
ha yá at shí	
ch'a wtoosheeyí	
ch'a haa <u>x</u> 'éidei <u>x</u> yi.aa <u>x</u> í.	
Ha yéi áyá yá shí kei gaxtooshée.	
"Shunliháash."	
Handei yaynák! Handei yaynák!	
Woosht yidanák!	50
Ha yá shí ax tuwáa sigóo	
yan ka <u>x</u> waneegi.	
Ha yá <u>k</u> aa	
<u>k</u> aa jee yu <u>x</u> gugwagoodí—	
Kélk'! Goosú wa.é?	
Yaax' haagú a <u>x</u> kéilk'!	
Yáa yeedát áwé	
a <u>x</u> tuwáa sigóo atx w <u>x</u> alayei <u>x</u> í	
yá shí.	
Yá yan yisineiyí	60
kootéeyaa,	
haa éesh hás ádi	
haa káani s ádi.	
Aaa,	
tla <u>x</u> áyá	
Lingítch sh tóo <u>x</u> isnóogun.	
Yéi yateeyi át	
tle <u>k</u> aa jikawdu <u>k</u> aayí tsá	
á <u>x</u> ashee.	
Aaa,	70
yáa yeedát áwé a <u>x</u> tuwáa sigóo at <u>x</u> xwalayei <u>x</u> í yá shí	
aaa,	
yá aadéi yéi jeeyaneiyi yé.	
Aaa,	

"Continue! Continue! Keep on dressing, keep on dressing. When a village becomes boring a noble child dies." This is how you felt, Lyekwudusdéich. When we were to have this ceremony, it was as if you put your mourning aside for this. This is the reason awhile ago you didn't finish your song.	40
Yes,	
we would like	
to sing	
this song	
just so you could hear it from us.	
In this way we will sing this song.	
"Shunlihaash."	
Move close! Move close!	EΩ
Get close together!	50
Now I would like to explain	
this song. Now when this man	
was going out to be killed— Nephew! Where are you?	
Come over here, nephew!—	
At this moment	
I would like to use	
this song.	
This totem pole	60
that you have completed	
is our fathers' thing,	
our brothers-in-law's thing.	
Yes,	
how very	
awkward it was to a Tlingit.	
Only when a person is commissioned	
did we touch	
a thing of this nature.	
Yes,	<i>7</i> 0
at this moment I would like to use this song,	
yes,	
for your work.	
Yes,	

yaax' haat has koowatini aa, ch'a uwayáa yá lingit'aaní tóotx áyá. yáax' haat <u>k</u>uyawdiháa i yéi jineiyí, 80 aaa. Tlél kwas yá Lingít yinaanáx kawuhaayín Dleit Káach ijikawukaayí. Ách áwé kaa jee yux gugwagóot wé káa. Aagáa áwé kei akakwgwashee nook áwé wé shí. Àa yaa gútch wé neil. Yáax' áwé yéi yanakéich, "Ho! Ho! Ho! Ho! Ho!" Chush ya yeedéi x'awusdaaych. 90 Aagáa áwé yéi yaawakáa, "Góok! Yúx xát kanayhaakwdéi! Yúx xát kanayhaakwdéi!" Aaa. áyá atx gaxtulayéix yeedát. Ch'u uwayáa igeinyaax yux gukwagoodi yáx áyá sh tuxdinóok kélk'. Hóoch'i aayí áyá <u>x</u>át yú áa yéi <u>x</u>at teeyí yé. Aaa, gwál dei wéidu ách wusikoo <u>k</u>áa 100 tsu vá shí. Ach áwé kei gaxtoosheeyí, kei gaxtooshée dei. 103

[Song: Shunlihaash]

A huwaa haa ei hei hu wei ya A huwaa haa ei hu waa haa ei hei huwei ya A huwaa haa ei ya hei hei hoowei hoowaa aa.

Yu<u>x</u> <u>x</u>at kanayhaakw dei, hoo wei ya. Yu<u>x</u> <u>x</u>at kanayhaakw a<u>x</u> kaa-gee has-a. Yee xoot angalgein-a, hei hei hoowei hoowa aa.

103

those who came here. it is as if they are from all over the world. many people came here for your work, 80 ves. But it was not a tradition of our people to have the white people commission someone. This is why a man would go out to face the people's weapons. Then, when he was going to sing this song, he paced around in the house. Now and then he would say, "Ho! Ho! Ho! Ho! Ho!" He would cry out in fear for his life. 90 Then he said. "Begin! Cry me out now! Cry me out now!" Yes, this is the song we will use now. It's as if I'm going out in place of you is how I feel, nephew. I'm the last one from the place I'm living. Yes. 100 maybe there are people who know this song, too. This is why we will sing it,

[Song: Shunlihaash, composed by Kul'ootl']

A huwaa haa ei hei hu wei ya A huwaa haa ei hu waa haa ei hei huwei ya A huwaa haa ei ya hei hei hei hoowei hoowaa aa.

we will sing it now.

Cry me out now, ei, hoo wei ya. Cry me out now, my mother's brothers Let me look among your faces, hei hei hoowei hoowa aa.

220 Daanawáak

Shunlihaash-aa ei hoo wei ya. Shunlihaash-aa a<u>x</u>adawoodli. A<u>x</u> leel-ak'w has hidi aana<u>k</u> yei na<u>x</u>dzeegeed-aa, hoowa aa.

Aaa,	104
yéi áyá a <u>x</u> toowú yatee,	
ax éesh hás,	
ax kaani yán.	
Hooch'in yís áyá,	
yéi xat kawdiyaa.	
Ax léelk'wch áwé chush yeedéi kawdlishee,	110
Gun <u>x</u> aa Guwakaan,	
chush ya yeet akawdishée.	
Yéi yá <u>x</u> 'aya <u>k</u> á,	
"Dei héidei kwgóot yeenák,	
dei héidei.	
Xát áwé yoo x'axatánk,"	
yoo áwé <u>x</u> 'aya <u>k</u> á.	
Aaa,	
yá shí áwé adaa yoo x'ayatánk.	
Ách áwé yáa yeedát at <u>x x</u> alayéi <u>x</u> .	120
Waa sá yat'éex',	
aaa,	
sh daat <u>k</u> aa shuwuxéex.	
Aaa,	
ch'a yee wakshiyeet áyá xwaahaan,	
a <u>x</u> éesh hás,	
a <u>x</u> kaani yán,	
tsú a <u>x</u> aat hás <u>x</u> siteeyi áa.	
Aaa,	
yá a <u>x</u> kéilk'	130
yáat woogoodi,	
aaa,	
yéi áyá a <u>x</u> toowú yatee.	
Yéi.	
Aaa	
yáa yeedát áwé	
a <u>x</u> tuwáa sigóo tsú adaa <u>x</u> 'a <u>x</u> dataaní.	
Aaa.	
Yá dziyáak	

The end has floated out, ei hoo wei ya.

The end of my trouble has floated out

From my mother's ancestors' house I have done this,
hoowa ei hoowa aa.

104 Yes. this is how I feel, my fathers, my brothers-in-law. This is for the last time I'm doing this. 110 My grandfather sang this before he died, Gunxaa Guwakaan. He sang it before he died. He said this, "I'm already going from among you to the other side, already to the other side. It is me speaking," is what he said. Yes. the song is the one he is talking about. This is why I'm using it now. 120 It is so difficult, yes, when your relatives have died off. I'm just standing around in your sight, my fathers, my brothers-in-law, also you who are my paternal aunts. Yes, this nephew of mine 130 who is walking around here, yes, this is how I feel. How I feel. Yes, and now I would like to speak about this again. Yes. Awhile ago

wé gáanx'	140
aaa,	
at wuduwashée.	
Tléil yan shaxwlahéek.	
Aaa, yáa yeedát	
yá gáanná <u>x</u> yei <u>k</u> watsa <u>k</u> aa,	
a uxtaagáni x'áanáx áwé wooshoo	
wé s'áak.	4
Aaa.	
Yaa gagóot wé <u>k</u> áa,	
ax satéen áwé du géidei yanashíxi	150
wé gooch,	
aagáa áwé du toowú yéi yatee,	
aaa, atóo kei akawagíx' du óonayi.	
Aagáa áwé ch'a altín.	
Ch'a altín.	
Tlél ayóo áyá <u>x</u> ooteen.	
Tlé wé dleit tóonáx áwé yagas.éich, yu.á,	
wé gooch <u>k</u> u.áa.	
Waananei sáwé tsu gunéi ushéexch du yinaadéi.	
L áyáx yéi agoosteen áwé,	160
du óonayi yaná <u>x</u> awlitsáa <u>k</u> .	
Yaná <u>x</u> awlitsaa <u>k</u> du óonayi.	
Aagáa áwé agéidei yat <u>x</u> uwagút.	
"Waasá kwshéi eewanéi cháa?	
Waasá kwshéi eewanéi?"	
Aagáa áwé sh yaadá <u>x x</u> 'awdli.áat.	
Woosh yaat <u>x x</u> 'awli.áat.	
Aagáa áwé awsiteen.	
A <u>x</u> 'aaná <u>x</u> naashóo	
du u <u>x</u> <u>x</u> 'áakná <u>x</u>	170
wé s'áak.	
Aagáa áwé yéi ayawsi <u>k</u> aa,	
"Tlél cháa eewunéi, cháa.	
I eedéi <u>k</u> wadashée."	
Aagáa áwé du lítayi aa <u>x</u> kéi aawatee.	
"Yan in!. Yan in!"	
Aat <u>x</u> kei ayéesh áwé,	
wé dleit kát áwé uwaxíx	
wé s'áa <u>k</u> .	
Yéi kunaleiyi yéi yawjixíx	180

Austin Hammond

wé gooch, aagáa áwé aax aawatee. Aagáa áwé yei adaayaká, "Aax kei kgwatée, ch'a ax jee yéi kgwatée. Xat ku.aa x'wán idashi." Ách áwé yeedát, aaa, yá du uxx'áatx kei wtuwateeyí át áwé 190 ch'a haa jee yéi kgwatée. Aaa. la<u>x</u>eitl atóoná<u>x</u> haa jee yéi wootee yá gáannáx yéi kgwatsak kootéeyaa. Aaa, yaandéi gaxtootee, yá du ux x'aatx kei wtuwayishi aa, haa jeex' laxeitl yáx nagateeyí. Yéi áyá a<u>x</u> toowú yatee. 200 Aaa, tsu yá ax sáni yá xóots. Ldakát véidei ává yeedát yá dleit káach k'idein at wusi.áx. At gasa.aaxí aadooch sá has du een kawuneegí. Ldakát át yáx áwé Lingítch woosikóo, wudashée a éex wuduxooxú. 210 Aaa. yá xóots yaa kgagudín áwé ch'a yéi kunaleiyi yéidei áwé. Ax éesh hásx áwé sitee xóots. Aagáa áwé yéi daayadukáa nuch, "Eesháan <u>x</u>át! A<u>x</u> at<u>x</u>aayí ka<u>x</u> át <u>x</u>waagoot." Aagáa áwé kaa x'éit us.aaxch. Ach adaa yóo x'axatangi át 220 ax sani hás.

had backed a short distance away from him the man picked up the bone. Then he said to the wolf. "I'll take it. I will just keep it. But please help me." This is why now, yes, we will just keep this object pulled 190 from between the totem's teeth. Yes. this totem pole that will stand outside has brought us luck. Yes, we will keep this bone pulled from between its teeth, so that it can become good luck for us. This is how I feel. 200 Yes, also my paternal uncle this brown bear. In many ways now the white people listen to this. Let them listen to whoever tells them. We Tlingit know every animal when we ask them for help. 210 Yes, this brown bear when it ambles on. only a short distance. Brown bears are my fathers. This is when we ask them, "Take pity on us. I'm here for my food." This is when it would hear us. 220 This is the reason I'm talking about it, my paternal uncles.

Kaa x'éit us.aaxch yéi daa yadukaayí, "Xát tsú ax atxaayi yá akax át xwaagoot." Aagáa áhé kaanák tlivaadei awoodagóotch. Yáa yeedát áwé yéi duwasaakw, guk yik dagéix', guk yik dagéix'. Yáa yeedát áwé haa x'éit wusi.áx dziyáagidáx. 230 Aadéi a daa yoo x'atuli.atgi yé haa x'éit wusi.áx. Aaa. guk yik dagéix' yóo toowasáakw, aaa, yá xóots. Aaa, ách áwé yeedát yá a daa yóo x'ayla.átgi 240 ax sani hás, tlax yeekaax áwé ax toowú dikeet yas.éin. yáa yeedát áwé ch'áak' wé ch'áak' a saa a yát yeeyteeyi ldakát uháan áwé kindax'ein yawtudixoon, kindax'ein yawtudixoon yee kaax tuwu ké. Aaa. 250 Haa yadaax áwé yayeeyshée. Aaa, yéi áyá a daa<u>x</u> tuwatee, yéi. Gunalchéesh. (Unidentified) Gunalchéesh.

They listen to us when we say to them, "I'm over here for my food, too." This is when they turn away from us. We call them big ears, big ears. They are listening to us right now 230 from awhile back. They are listening to the way we have been speaking of them. Yes. we call them big ears, ves, this brown bear. Yes. This is why now 240 when you speak about them, my paternal uncles, my feelings are lifted because of you. Yes. now this eagle, this eagle that you have given a name, all of us have lifted our heads, have lifted our heads, being proud of you. Yes, 250 you have cleansed our faces. Yes. this is how I feel about you, this is how. Thank you.

(Unidentified) Thank you.



Speeches for the Removal of Grief from the Memorial for Jim Marks, Hoonah 1968

Ch'a yax at gwakú "a kayaa áyá s ootee tlax kaawayíkt jeenaxéegaa."

- Naa Tláa

It is like the saying "They are only imitating.... lest they grope aimlessly."

- Jessie Dalton

...Robes to capture the passion of your tears....

Willie Marks, 1981
 Forty Day Party for his daughter Eva

Goox Guwakaan Xunaa, 1968

Aaa! Héi Yaakwdáatdei áwé kawdiyaa wé haa xoodáx K'aadóo. Áx' áwé du vee tl'átgi kuwdzitee. Aaa. Ách áwé chush t'akkaadéi asawdihaa du kéek'. Aadéi yaa ajiklaháa áwé yá Ltu.áa watyeex' yaakw du een héent wudik'ít' naháayi. Hú ku aa áwé sh wudzineix. Aagáa áwé kaa eeti sheex'í áwé kadulsheex, kaa eeti sheex'í. Yú kaa wanáak áwé áa ganúkch hú ku.aa, wé aadéi <u>x</u>'ayadu<u>k</u>a yé. Ch'a kóodáx sh nadlileyi yáx áwé ganúkch. Yan née áwé ya kaa eeti sheex'i, aagáa áwé x'awduwawóos', aaa, wé ax léelk'w K'aadóo. Aagáa áwé yéi yawdudzikaa "Tleigíl ch'a wáa sá yakgeekaa yá i kéek' eetéex' <u>x</u>á?" "Yak'éi <u>x</u>á! Ax daadéi gunei y.á." Chush daadéi áwé kuwdixoox. Ach áwé du daadéi gunayéi a.áat. Aadéi áwé kéi akaawashée wé shí, awliyexi shí.

10

20

Jim Marks Hoonah, 1968

Yes! From among us K'aadóo went to Yakutat. It was there he got his land. Yes. For that reason he asked his younger brother to go with him. 10 While he was taking him there, at the entrance to Lituya Bay the canoe swamped with them, these travelers. But K'aadóo saved himself. At that time memorial songs were composed, memorial songs. But he would sit away from what people were saying. He would sit as if he wanted to be far away from everyone. 20 When these commemorative songs were finished, that's when he was asked, my grandfather K'aadóo. That's when they said to him, "Aren't you going to say anything to eulogize your younger brother? " "Fine! Sure. 30 Come, gather around me." He asked them to gather around him. That's why they began to gather around him. There he began to sing the song, the song he had composed.

Kwéix' Éesh (1) Xunaa, 1968

 $A\underline{x}$ tuwáa sigóo \underline{x} 'a \underline{x} wdataaní a \underline{x} éesh hás, a \underline{x} aat hás.

(Unidentified) Áawé. Tlákw áyú yéi kwdayéin. Yáa yeedát ax kaani hás, ax éesh hás, ax aat hás,

(Keet Yaanaayí) *Áawé.* has <u>k</u>ustéeyin yee éesh hás yee yátx'i tsú has <u>k</u>ustéeyin, yáa yeedát Keet Yaanaayí ax éesh

(Unidentified) Áawé.

yáa yeedát tla<u>x</u> haa tukayeeysinúk. Tléil áwé aadéi na<u>x</u>tudzigeedi yé <u>k</u>oostí, yá i yátx'i<u>x</u> haa sateeyí <u>k</u>a yá i dach<u>x</u>anx'i yán<u>x</u> haa sateeyí, yá i aat hás

ldakát hás.

Ch'a yóo naxtoosgeedí góot áyá i aat a daa s tuwli.aat has du tuwáx' áyú sigóo yéi yeeguwáatl' chance haa jeet yeeyteeyí.

(Keet Yaanaayí) Áawé.

Yéi áyá.

(Keet Yaanaayi) Áawé. Yéi kgwatée.

10

10

20

Matthew Lawrence (1) Hoonah, 1968

I would like to say something my fathers, my father's sisters.

(Unidentified) Áawé.

It has always been this way.

At this moment

my brothers-in-law,

my fathers,

my fathers' sisters,

(Willie Marks) Ágwé.

vour fathers were once alive

your children, too, were once alive,

at this moment

Keet Yaanaayí

my father

(Unidentified) Áawé.

at this moment

how much we feel your stirring.

There is nothing we can do,

we who are your children, and we who are your grandchildren,

these

sisters of your fathers

all of them.

With nothing else for us to do

your fathers' sisters thought

they would like you

to give us a chance for just a little while.

(Willie Marks) Aawé.

That's the way it is.

(Willie Marks) Áawé. It will he.

Kaatyé Xunaa, 1968

Ax sani hás,

áwu tsú tléix' ax kaani yán

(Keet Yaanaayi) Áawé.

tóox' áyá tuwanook yee ée sh danóogu,

tóox'.

A<u>x</u> káak áyá <u>x</u>'ak<u>k</u>watee <u>K</u>áak'w Éesh du yéet

i yádi.

Tsalxaan Guwakaan,

(Tsalxaan Guwakaan) Héiy!

Yakwdeiyi Guwakaan,

(Yakwdeiyí Guwakaan) Héiy!

yee káani áyá x'akkwatee.

(Unidentified) Áawé.

Ax káani Keet Yaanaayí,

(Keet Yaanaayi) Áawé.

Kaatooshtóow,

(Kaatooshtóow) Áawé.

yee káani <u>x</u>'ak<u>k</u>watee.

, Gusatáan,

(Gusatáan) Héiy!

Yee yádi <u>x</u>'ak<u>k</u>watee.

(Unidentified) Gunalchéesh á.

Ha de

yat'éex'i át áyá,

<u>k</u>a jiklidzée

yéi yateeyi át

ka kwlits'ígwaa.

A eetéenáx áyá haa wootee

a<u>x</u> káak hás.

Héen áyú gadéich, héen. 10

David Kadashan Hoonah, 1968

My fathers' brothers,
all my brothers-in-law,
(Willie Marks) Áawé.
we are feeling
your pain,
feeling it.
I will imitate my mother's brother
son of Káak'w Éesh,
your child.
Tsalxaan Guwakaan,

(George Dalton) *Héiy!*

Yakwdeiyí Guwakaan,

(David McKinley) Héiy!

I will imitate your brother-in-law. (Unidentified) Áawé.

my brother-in-law Keet Yaanaayí (Willie Marks) *Áawé*.

Kaatooshtóow,

(John Wilson) Áawé.

I will imitate your brother-in-law Gusatáan,

(Harry Marvin) Héiy! I will imitate your child.

(Unidentified) Thank you.

Surely this is a hard thing to do, and it is difficult to handle a thing like this, and sensitive.
We are in need of my mother's brothers.

The river would swell, the river.

20

Yá héen yík	
héen áyá, séew áyá a kaadéi daak ustaanch, yá áa.	
Tóo hinyawudaayí áwé yá aas tayeex áwé daak kagadéich	
yá héen.	
Yá <u>k</u> útľkw áwé aa <u>x</u> shalawaľ nuch.	30
Aagáa áwé yéi tundatánch	
k'e ngal'éex'.	
Wool éex idáx áwé, héen yíx áwé yei klaháshch	
héen yíx.	
Yá lingiťaaní kaadéi áwé tundatánch.	
Yá éil' tlein káx' áyá ulhaashch.	
Aatx áyá a káa ayaxdateech	
(Naawéiyaa) I x'éit wusi.áx i kaani yán.	
A káa ayaxdatéex' áwé; gunayéi ulteetch	
yak'éiyi l'éiwdei.	
Át galatídín áwé l'éiw	40
yan ulhaashch. Áa yan yoo latitgi nuch,	
áa yan yoo latitgi nuch.	
Yáax' áwé a yeetx yaa kdawúxch,	
a yeetx yaa kdawúxch.	
Áa yan utaanch.	
S'ootaatx' áwé a kaadéi yaa akdagánch	
s'ootáatx'.	
Yá a kát awdagaaní áwé a daadéi yaa gaxúkch.	
Gu.aal kwshé yéi yee wuteeyík	
a ítdáx	50
a <u>x</u> kaani yán,	
ch'a aadéix siteeyi aa.	
(Naawéiyaa) Gunalchéesh.	
Xat yeeyliyéx, Chookaneidí.	
Xat yeeyliyéx.	
Ách áyá <u>x</u> át tsú yee jiyís yéi sh <u>x</u> adinook.	
Aaa!	
Xwaayeenák áwé yéi yatee.	
(Keet Yaanaayî) Áawé.	
Yá lingit'aaní geix'	
woosh jin toolshát yeisú.	
Tléil sh tóotx yoo tudateek uháan tsú haa nanéiyi.	60
Aaa,	
yáa yeedát	

60

In the river. in the lake, the rain would fall on the water. When the river had swollen, it would flow under the tree. The earth would crumble along the bank. 30 That's when it would think of breaking. When it had broken, down the river it would drift, down the river. It would think of going out into the world. On this great ocean it would drift. From there the wind would blow over it. (Harry Marvin) Your brothers-in-law are listening to you. After the wind would blow over it; it would begin to roll with the waves to a fine sand. When it rolled on the waves to the sand 40 it would drift ashore. It would be pounded there by the waves it would be pounded there. Here the tide would leave it dry, would leave it dry. It would lie there. In the morning, sun would begin to shine on it in the morning. After the sun had been shining on it, it would begin to dry out. My hope is that you become like this from now on, 50 my brothers-in-law, whoever is one. (Harry Marvin) Thank you. You created me, Chookaneidí. You created me. This is why I, too, feel for you. This is the way Xwaayeenák is. (Willie Marks) Áawé. In this world we're still holding each other's hands.

At this moment

Yes!

Neither do we overlook our dead.

a kát adagánni, gu.aal kwshé a tóodei wuxoogóok yee yadaax kaawadaayi aa.

(Keet Yaanaayí) Yéi kgwatée xá.

Sagóox naxsatee yéi áyá yee jiyís tuxdatán.

(Naawéiyaa) Gunalchéesh.á.

Yeeysikóo yee kaani yán yee aat hás.

(Keet Yaanaayi) Gunalchéesh.

(Naawéiyaa) Gunalchéesh.

Yéi áyá.

Aaa!

Yándei ga<u>x</u>yeenáa<u>k</u>.

Yee sani hás, aadéi s <u>k</u>unoogu yé yéeyi yéi koona<u>x</u>dayeinín

aaa,

yee tuwú daa ooxlit'aayi átx'.

Yee yáx' yéi hás a daanéi noojéen,

yá a eetée kuxdziteeyi aa yeedát. Yéi áyá.

(Keet Yaanaayí) Gunalchéesh. (Naawéiyaa) Gunalchéesh.

(Wudlisáa.)

Ax kaani yán

ax sani hásx siteeyi aa (Keet Yaanaayí) Áawé.

ax aat hásx siteeyi aa

(Aan Káxshawustaan) Åawé.

ch'a a kayaa áyá yéi gaxtusanéi.

Hél aadéi has yee daangwaanéiyi yé.

Ha yeeytéen áyá a tóot hás nák.

Aaa,

kagaxtoo.aakw.

Yéi áyá.

(Yáax' áyá Xíxch'i S'áaxw daasheeyí kei kawduwashée. Da<u>x</u>.aa shí <u>k</u>u.aa Shaatu<u>k</u>wáan Keidlí S'áaxw daasheeyí.) 70

when the sun shines on it, my hope is that it dries out the flowing from your faces.

(Willie Marks) It shall be.

Let it turn to joy for you is my wish.

(Harry Marvin) Thank you. Thank you.

You all know your brothers-in-law, your fathers' sisters

your fathers' sisters.

(Willie Marks) Thank you.

(Harry Marvin) Thank you.

This is the way it is.

Yes!

You will stand.

The way your fathers' brothers used to do

when such things happened,

yes,

these are the things that might warm your feelings.

The people I'm living in place of now

yes,

used to bring these out for you to see.

This is the way it is.

(Willie Marks) Thank you. (Harry Marvin) Thank you.

(The orator rests.)

My brothers-in-law,

those who are my father's brothers

(Willie Marks) Áawé.

those who are my father's sisters

(Mary Johnson) Aawé.

we will only imitate (our ancestors).

There is no way they can do anything for you.

You can see them wearing them, yes.

We will try.

This is the way it is.

(At this point, two songs are sung, the Frog Hat Song, and Mountain Tribe's Dog Hat Song.)

70

Yéi áyá. Yéi áyá.

> (Kaakwsak'aa) Gunalchéesh. (Keet Yaanaayí) Gunalchéesh. (Kaakwsak'aa) Gunalchéesh, ax éesh hás. (Aan Káxshawustaan) Gunalchéesh.

Keewaax.awtseix Guwakaan Xunaa, 1968

Yee yadaax kaawadaayi aa káx áyá ax léelk'w yátx'i ax kaani yán ax éesh hás, ax aat hás.

(Unidentified) Áawé.

Hás áyá yáat.

Wáa yadali át yáx sáyú nateech

haa jeex'

hé aa x'awdatáan.

Ch'a á yeeysikóo yéi yangakéinín "Káa váx i daa ax tuwatee, dlák'." vá

"Káa yáx i daa ax tuwatee, dlák'," yóo.

A yá<u>x</u> yatee a<u>x</u> dláak'. Yándei ashagu<u>x</u>lahéek,

aaa, áyá ax jiyís,

(Keet Yaanaayî) *Áawé.* a<u>x</u> jiyís yándei ashagu<u>x</u>lahéek. I gu.aa yá<u>x</u> x'wán, dlák'.

(Naa Tláa) Yéi kgwatée.

Has du yáa x'wán nalyaakw, i léelk'w hás yáa x'wán.

Wéix has yaawanák, has du eetéedáx kut ayawji.áak yáa yeedát,

i yátx'i

i káalk'w hás.

10

This is all. This is all.

> (David Williams) Thank you. (Willie Marks) Thank you. (David Williams) Thank you, my fathers. (Mary Johnson) Thank you.

William Johnson Hoonah, 1968

This is for what flowed from your faces my grandfather's children my brothers-in-law my fathers, my father's sisters.

(Unidentified) Áawé.

This is them here.

What a heavy burden it is always like

for us

for them to speak.

You all know how it is when a person might say,

"You are like a man to me, sister."

My sister is like that.

She will complete this for me, yes,

(Willie Marks) Áawé.

she will complete this for me. Have courage, sister.

(Jessie Dalton) It will be done.

You will explain your grandfathers for them, won't you?

They are standing there; from among them

one is missing now, from among your children,

your brothers' children.

10

Naa Tláa Xunaa, 1968

Eeshandéin ágé haa daa tuwatee uháan tsú ax káalk'w hás

(Keet Yaanaayî) *Áawé*

ax éesh hás?

Ch'a tléix' ax éesh hás.

Tléil eeshandéin haa daa tootí uháan tsú.

Yá wooteeyeit.

(Unidentified) Yéi áwé.

Ách áwé a yáx has x'ayeey.áxch

yee éesh hás,

tle tlax ch'a nichkáx aa wooxéexgaa ku.aa áwé

(Naawéiyaa) Gunalchéesh.á.

(Keet Yaanaayí) Gunalchéesh.

yee wakhéeni yee yadaax kawadaayi aa.

A káx áwé

yáa yeedát yanax yeik kawdik'ít'

yee éesh hás

yanax yeik has kawdik'ít'.

(Naawéiyaa) Hó hó.

Ch'u yáadu sígé hás,

yóo áwé has du daa a<u>x</u> tuwatee a<u>x</u> léelk'w hás.

(Keet Yaanaayí) Gunalchéesh.

Yáat a tóot ahan aa

yá Shaatukwáan Keidlí.

Ch'u oowayáa áwé

yee sh tudanóogu káx ashaayi yáx áwé daa yoo tuxaatánk,

(Keet Yaanaayí) Gunalchéesh.

ax éesh hás, ax káalk'w hás

a<u>x</u> aat hás,

aaa.

Yáadu áwé

10

Jessie Dalton Hoonah, 1968

Does death take pity on us too my brothers' children, (Willie Marks) Áawé. my fathers?

my ramers:

All my fathers.

It doesn't take pity on us either, this thing that happens.

(Unidentified) That's how it is.

Which is why you hear their voices like this,

your fathers,

lest your tears fall without honor

(Harry Marvin) Thank you. (Willie Marks) Thank you.

that flowed from your faces.

For them

they have all come out at this moment, your fathers

have all come out.

(Harry Marvin) Hó, hó.

They are still present is how I feel

about my grandparents.

(Willie Marks) Thank you.

Here someone stands wearing one,

this Mountain Tribe's Dog.

It is just as if

it's barking for your pain is how I'm thinking about it,

(Willie Marks) Thank you. my fathers, my brothers' children my father's sisters,

yes.

Here

10

yá a shóodei han aa.

Geesh Daa<u>x</u> Woogoodi Yéil áyá. Yáaná<u>x</u> á a shóodei aa ahán.

Lyeedayéik x'óowu.

A áwé yáanáx á. A shóodei ahán.

Aaa

(Naawéiyaa) Gunalchéesh.

(S'eilshéix') Gunalchéesh.

S'igeidi X'óow áwé

Jilkáatdáx.

Naaxein.

(Unidentified) Uhuh.

(Keet Yaanaayí) Gunalchéesh.

Lutákl

yee éesh

du x'óowu yéeyi áwé du naaxeiní yéeyi.

(Unidentified) Hó hó.

(Naawéiyaa) Gunalchéesh.

Yee kujéen áwé tsú

gági uwagút.

(Séi Akdulxéitl') Hó hó.

(Keet Yaanaayí) Gunalchéesh.

Aaa,

yáa yeedát áwé

ch'a ldakát áwé gági yawdixuni yáx áwé ax tuwáa yatee.

Yee aat hás

a<u>x</u> tláa

Saayina.aat

(Unidentified) Yéi á.

(Unidentified) Yéi áwé.

du x'óowu

K'eik'w X'óow.

Aaa.

(Unidentified) Yéi á.

(Keet Yaanaayí) Gunalchéesh.

Yá yee yáx sh daa tuwditaani káa áwé aan áwé a yát yakw.ukooxch aaa,

30

40

someone is standing next to it.

It's Raven Who Went Down Along the Bull Kelp. Someone is standing closer, next to it.

Lyeedayéik's robe.

That is the closer one. Someone is standing next to it.

30

(Harry Marvin) Thank you. (Eva Davis) Thank you.

It's The Beaver Blanket

from Chilkat.

A Chilkat Robe.

(Unidentified) Uhuh.

(Willie Marks) Thank You.

Lutákl

your father

it was once his blanket, once his Chilkat robe.

(Unidentified) Hó, Hó.

(Harry Marvin) Thank you.

Because of you

he came out.

40

(David McKinley) Hó, hó. (Willie Marks) Thank you.

Yes

at this moment

all of them seem to me as if they're revealing their faces.

Your fathers' sisters,

my mother,

Saayina.aat

(Unidentified) That's it.

(Unidentified) That's right.

her robe

the Tern Robe.

Yes.

(Unidentified) That's it.

(Willie Marks) Thank you.

A person who is feeling like you would be brought by canoe, yes,

yee éesh hás x'aayí Gaanaxáa. Aagáa áwé dusáaych áwé vú.á yá eeshandéin sh daa tuwditaani káa, Eésh, Séi Akdulxéitl', (Séi Akdulxéitl') Áawé. 60 aaa. Ax léelk'w yéet Koowunagáas', (Koowunagáas') Áawé. ax káalk'w véet Keet Yaanaayí, (Keet Yaanaayi) Áawé. aaa, ax éesh kéilk' Xooxkeina.át. (Xooxkeina.át) Áawé. Tlax wáa sáyú vee tula.eesháani káx gági yawdixún i aat hás, 70 Kálk'w (Keet Yaanaayí) Gunalchéesh. Kaatooshtóow, (Kaatooshtóow) Áawé. Kaakwsak'aa, (Kaakwsak'aa) Áawé. aaa, ax éek' shát Aan Káxshawustaan. (Aan Káxshawustaan) Aawé. Aaa tlax wáa sá gági yawdixuni yáx has du daa yoo tuxaatánk yee kaani yán. 80 Aaa gági has yawdixún. Weihá aayí k'oodás': ch'a yeisú áwé du daax'

to your fathers' point, Gaanaxáa. That is when the name would be called out, it is said, of the person who is feeling grief. Yes. Father! Séi Akdulxéitl' (David McKinley) Aawé. Yes. 60 My grandfather's son Koowunagáas' (Joe White) Áawé. My brother's daughter's son Keet Yaanaayi (Willie Marks) Aawé. yes, my father's sister's son Xooxkeina.át. (Pete Johnson) Áawé. How very much for your grief 70 your fathers' sisters are revealing their faces, My brother's son (Willie Marks) Thank you. Kaatooshtóow, (John F. Wilson) Áawé. Kaakwsak'aa. (David Williams) Ágwé, yes, my brother's wife, Aan Káxshawustaan. (Mary Johnson) Aawé. Yes how very much it is as if they're revealing their faces is how I'm thinking about them, your sisters-in-law. 80 Yes. they are revealing their faces. The shirt that belonged to Weihá: it was only recently we completed

yan yéi jiwtuwanéi. Á áwé wéit.

Yeil K'oodás'.

(Keet Yaanaayí) Gunalchéesh. Tsu hú áyá yáat yan x'ayeey.áx Weihá.

Yá ax éek'.

Yá yee Guwakaaní,

hú du jeex' áwé yándei kwga.áax, vá Weihá k'oodás'i.

(Unidentified) Gunalchéesh.

Áwé ch'a oowayáa yee wakshiyeex' gági gútxi yáx áwé yatee yeedát. (Keet Yaanaayí) Aaa.

Aaa.

Tlax wáa sá

sh tuwaagáa kastéevin hú tsú yá yee káani.

(Unidentified) Ha waa sá.

Yeilkudei Hít X'óow.

Yáat a tóot hán yá yee aat.

Tliyaanax á aa ku.aa áwé

Yaakaayindul.át yee aat,

aaa.

Dei ch'a ch'áakw áwé has du ée antulaxáchch. yá yee aat hás,

yee éesh hás.

(Unidentified) Hó hó.

(Unidentified) Gunalchéesh.

Geesh Daax Woogoodi Yéil K'oodás'

i éesh.

Kaadéik,

(Kaadéik) Áawé.

du k'oodás'i

á áwé.

(Unidentified) I x'éit wusi.áx i káalk'w hás.

Á áwé, tléil yéi a daa yoo tooxatánk kaawagaan áyá yóo.

90

100

90

the rites for him.
That's the one there.

The Raven Shirt.

(Willie Marks) Thank you.

You heard him here also,

Weihá

this brother of mine.

This Peacemaker of yours:

this shirt of Weihá

will remain in his hands, in his care.

(Unidentified) Thank you.

Now it's as if he is coming out for you to see.

(Willie Marks) Yes.

Yes.

How proud

he too used to be

wearing it,

this brother-in-law of yours.

(Unidentified) How very much.

The Raven Nest House Robe.

100

Here this father's sister of yours stands wearing it.

And on the far side

is Yaakaayindul.át, your father's sister,

yes.

We had long since given up hope of their return,

these fathers' sisters of yours, your fathers.

(Unidentified) Hó, hó.

(Unidentified) Thank you.

Yes.

Raven Who Went Down Along the Bull Kelp Shirt, your father.

110

Kaadéik,

(Unidentified) Áawé.

it's his shirt,

that's the one.

(Unidentified) Your brothers' children are listening to you.

That's the one there; I don't feel that it burned.

Aaa,

Aaa. Ch'u shóogu á xáa wéix' aan i dayéen aan hán i sáni. (Keet Yaanaayí) Gunalchéesh. (Tsalxaan Guwakaan) Gunalchéesh. Ách áwé aaa. Gusatáan (Gusatáan) Ágwé. ch'a oowayáa ldakát yeewáan yee xwasaayí 120 ax kaani yánx siteeyi aa, aaa. A shunaayát ágé nkwaagoot ax kaalk'w hás? Aaa. A shunaayát ágé nkwaagoot? Ya k'éik'w áyá tléil yan uxlayaakwch, aaa, yá k'eik'w. Eeshandéin tuwateeyi káa káx' áwé daak koolyeechch 130 yee aat hás. (Keet Yaanaayi) Áawé. Aax áwé has du x'wáal'i a kaadéi has a kooldánch wé eeshandéin tuwateeyi káa. (Tsalxaan Guwakaan) I x'éit wusi.áx i káalk'u hás. (Naawéiyaa) Gunalchéesh. Aagáa áwé tléil áwé too kwdunook nuch has du x'wáal'i. Aagaa áwé vee tula.eesháani tín áwé 139 has du kúdi kaadéi has ayakawdliyiji yáx áwé has du daa ax tuwatee yee aat hás. (Naawéiyaa) Gunalchéesh.á. Aaa. Yáat ahan aa yáat ax tláa du káak du s'áaxu.

Yes. It's the same one in which your father's brother is standing there in front of you. (Willie Marks) Thank you. (George Dalton) Thank you. That is why, yes, Gusatáan (Unidentified) Áawé. it will be just as if I will have named all of you, 120 those who are my sisters-in-law, yes. Can I reach the end. my brothers' children? Yes. Can I reach the end? These terns I haven't completely explained, ves, these terns. Your fathers' sisters would fly out over the person who is feeling grief. 130 (Willie Marks) Aawé. Then they would let their down fall like snow over the person who is feeling grief. (George Dalton) Your brothers' children are listening to you. (Harry Marvin) Thank you. That's when their down isn't felt. That's when I feel it's as if your fathers' sisters are flying back to their nests with your grief. 140 (Harry Marvin) Thank you indeed. Yes. Here someone stands, here. my mother's mother's brother, his hat. Yes,

Taakú wátdei áwé yú á wookoox aagáa vú s'áaxw, du léelk'w hás xoodéi du léelk'w hás xoodéi. 150 Aaa. aax áwé du jeet kawdiháa yú.á yá Xíxch'i S'áaxw. A ťakkát áwé uwawúk vá Weihá jeedáx aa k'oodás'. (Tsalxaan Guwakaan) Yéi á. tsu Taakóonáx háhé haat kawdiyáa. Ách áwé gunalchéesh yóo x'ayaxaká yee dayéen aan has nági yáa yeedát. (Keet Yaanaayí) Gunalchéesh áwé. Aaa, 160 yá <u>k</u>uťaaygáa gági ugootch yá yee éesh. Aagáa áwé yee tula.eesháani káx áwé gági uwagudi yáx ax tusitee yá yee éesh du s'áaxu. Aaa, (Naawéiyaa) Gunalchéesh á. vee léelk'w du s'áaxu. Aan áwé yanax daak guganóok, 170 aan yee tula.eesháani teen áwé yanax daak guganóok. (Tsalxaan Guwakaan) I x'éit wusi.áx i kaalk'u hás. A yát sh gayisnoogóot ágé ax kaalk'u hás ax éesh hás, (Unidentified) Gunalchéesh. ax aat hás ax kaani yan. Ha yáa yeedát aaa. ch'a yax at gwakú "a kayaa áyá s ootee tlax kaawayikt jeenaxéexgaa" (Tsalxaan Guwakaan) Gunalchéesh á. 180 yá yee léelk'w hás aadéi x'ayakáayi yé.

to the mouth of Taku he went by boat then for that hat, to his grandparents, to his grandparents. 150 Yes. From there it's said he acquired the Frog Hat. Along with it came the shirt from Weihá. (George Dalton) That's it. Yes. it also came from Taku. That is why I keep saying "Thank you" that they're standing in front of you at this moment. (Willie Marks) Thank you. Yes. 160 during the warm season this father of yours would come out. That's when I feel it's as if your father's hat has come out for your grief. Yes. (Harry Marvin) Thank you indeed. your grandparent's hat. With your grief he will burrow down, 170 with it. with your grief he will burrow down. (George Dalton) Your brothers' sons are listening to you. Not that it can heal you my brothers' children, my fathers, (Unidentified) Thank you. my fathers' sisters my sisters-in-law. And now yes, it is like the saying "They are only imitating them lest they grope aimlessly," (George Dalton) Thank you indeed. the way your grandparents said. 180

Ách áwé a yáa has wudli.aadi yá<u>x</u> has yatee yee éesh hás. Yáadu aa

Yáadu aa.

Yáat a tóot ahan aa.

Yáa ax léelk'w

Yookis'kookéik du s'áaxu.

(Unidentified) Hó hó.

Yee dayéen

yanax wudihaan hú tsú.

Aaa.

(Unidentified) Hóho.

I éesh du s'áaxu

Koowunagáas'

(Koowunagáas') Áawé, gunalchéesh áawé.

yee dayéen yanax wudihaan,

(Keet Yaanaayí) Gunalchéesh.

(Unidentified) Gunalchéesh.

aaa

Kageet Kuyéik.

Aaa.

Yáax' áwé

aaa,

yá dziyáak yá ax éek'ch wuliyaagu aa:

yaa gaxlatídín yú aas.

Aagáa áwé yan galaháshín

gagaanch áwé a kát x'us.utsóowch.

Aaa.

Du tóodei áwé yaa gaxúkch

du tula.eesháani.

Yáa yeedát áwé yee káx' gági yawdzi áa yá gagaan

ax léelk'w hás

ľaxkeidí.

(Unidentified) Yéi á.

(Unidentified) Gunalchéesh.

(Unidentified) Hó hó.

Yáa yeedát

gu.aal kwshé yee tóodei wuxoogu yáx wooteek

210

190

190

That's why it's as if your fathers are guiding them. Here is one.

Here is one.

Here someone stands wearing one.

The hat of Yookis'kookéik, this grandfather of mine.

(Unidentified) Hó, hó.

He too has stood up

to face you.

Yes.

(Unidentified) Hó, hó.

Your father, his hat

Koowunagáas'.

(Unidentified) Thank you, indeed.

He has stood up to face you,

(Willie Marks) Thank you.

(Unidentified) Thank you.

yes,

the Loon Spirit.

Yes.

And here,

ves,

is the one this brother of mine explained a while ago:

200

how that tree rolled for a while on the waves.

Then when it drifted to shore

the sun would put its rays on it.

Yes.

It would dry its grief

to the core.

At this moment this sun is coming out over you, my grandparents' mask.

(Unidentified) That's it.

(Unidentified) Thank you.

(Unidentified) Hó, hó.

At this moment

my hope is that your grief

yee tula.eesháani.

(Tsalxaan Guwakaan) Yéi kgwatée.

(Keet Yaanaayi) Gunalchéesh, yéi kgwatée.

Géelák'w Shakee.át,

aaa.

A tóonáx áwé daak woodaxoonch

yee aat hás

Géelák'w tóonáx,

aaa.

Á áwé yáa yeedát wéit. Aan ahán, vá shakee.át

(Unidentified) Gunalchéesh á.

ax léelk'w du shakee.ádi.

(Keet Yaanaayí) Gunalchéesh.

Daanawáa<u>k</u> Xunaa, 1968

Ax tuwáa sigóo

xát tsú x'axwdataaní, ax sani hás, ax aat hás.

Aaa!

Tla<u>x</u> wáa sá

xát tsú eeshandéin ax toowú yatee,

aaa, yáax' haat xat kawdayaayí

aaa, l ch'u yee wakshiyee kwaashaadi át.

Ha yáa yeedát

yáax' aan

daak uwagút.

(Unidentified) I x'éit wusi.áx i sani hás.

Ldakát yéidei yéi yee ngatéenín áyú yoo x'atángi noojéen aaa, yá K'eedzáa.

Yáadu du x'óowu, yáat aan hán.

(Keet Yaanaayí) Áawé.

Tlax wáa sá yoo x'atángeen a daax'

yéi at nagatéenín <u>k</u>a du aat hás <u>x</u>oot nagaldléigún.

Yáa yeedát áyá a eetéenáx haa yatee.

220

be like it's drying to your core.

(George Dalton) It shall be.

(Willie Marks) Thank you. It shall be.

Géelák'w Headdress,

yes.

Your fathers' sisters

would reveal their faces from it,

from Géelák'w,

yes.

That's the one there now. Someone is standing there with it, this headdress

(Unidentified) Thank you indeed. my grandfather's headdress.

220

(Willie Marks) Thank you.

Austin Hammond Hoonah, 1968

I would like to speak

also, my father's brothers, my father's sisters,

Yes!

How very much

I too feel grief,

yes, and even that being here,

indeed, I am with nothing to show you.

At this moment

he came out

here with it.

10

(Unidentified) Your father's brothers are listening to you.

In many ways, when you were like this,

yes, K'eedzáa always used to speak.

Here is his robe, here he stands with it.

(Willie Marks) Áawé.

How much he used to speak of it

when things were like this and when he expressed affection among his father's sisters.

At this moment we are in need of him.

Ka yáanáx á a shóodei han aa vá Kaatyé tsu hú. Ax káak du x'óowu Tsagwált, 20 aaa. du eetéetx ax jee yéi wootee. (Keet Yaanaayi) Áawé. Ka yá tléix' yateeyi aa (Tsalxaan Guwakaan) Gunalchéesh. yá tléix' yateeyi aa. Aaa, ch'a kkwalayaakw. Tléil yáa yéi wootee. Ax éesh Keet Yaanaayi! (Keet Yaanaayi) Áawé. Yá yee káani yee daat x'ayanash.ákjeen. 30 (Keet Yaanaayí) Gunalchéesh. Yá haa jee yéi yatee Naatúxjayi yee tula.eesháani káx hú tsú tsú váax' (Keet Yaanaayí) Gunalchéesh. aaa yee tóodáx kei agatee. (Unidentified) Gunalchéesh. Ka yáa yeedát wé x'óow aaa, ch'a oowayáa jigwéinaa yáx ax jee kuwda.oowú. Yéi áyá xát tsú ax toowú yatee, ax aat hás. 40 (Unidentified) Gunalchéesh. (Unidentified) Gunalchéesh. (Unidentified) Gunalchéesh.

And on this side, someone is standing next to it,	
Kaatyé ne too.	
	20
My mother's brother Tsagwált, his robe,	20
yes,	
l own it in place of him. (Willie Marks) <i>Áawé.</i>	
And there is one thing,	
(George Dalton) Thank you.	
there is one thing	
yes,	
will just explain.	
It's not here.	
My father,	
Keet Yaanaayi!	
(Willie Marks) Áawé.	
This brother-in-law of yours would speak proudly of you.	30
(Willie Marks) Thank you.	
This Naatúxjayi whom we have,	
he too	
has also come here for your grief,	
(Willie Marks) Thank you.	
yes,	
to remove it	
from you.	
(Unidentified) Thank you.	
And now, that blanket:	
indeed, it's just as if it has become a towel in my hand,	
to wipe away your tears.	
This is how I feel too,	
my fathers' sisters.	40
(Unidentified) Thank you.	
(Unidentified) Thank you.	
(Unidentified) Thank you.	

Kweix' Éesh (2) Xunaa, 1968

Aaa, gunalchéesh áyá ax éesh hás, ax kaani yán. Yá gaaw ch'a yéi yiguwáatl' ax tuwáa sigóo x'axwdataani. Yan ashawlihík yá haa tláach. Ha tlax wáa laxéitlx sá haa wootee yá haa xoox' yéi teeyí yá haa tláa. Haa káx háni yáx yatee. Ax tuwáa sigóo yáat'aa xwalayaagú yá at wuduwateeyí, yá s'áaxw. Yee tula.eesháani áyá aan gugagóot. (Keet Yaanaayi) Áawé. (Tsalxaan Guwakaan) Gunalchéesh. Tsalxaan tóodei aan ayaguxdagóot yee toola.eesháani. (Kaatooshtóow) Áawé. Yee yadaaná<u>x</u> kawduwatl'oogu aa, aan gugagóot (Keet Yaanaayí) Gunalchéesh. yee éesh hás shaayí tóodei. (Unidentified) Yéi á. (Unidentified) Gunalchéesh.

10

Matthew Lawrence (2) Hoonah, 1968

Yes. this is in thanks my fathers, my brothers-in-law. At this time I would like to speak for just a short while. This mother of ours has completed everything. And what a great gift we have that this mother of ours is among us. It is as if she's standing for us. I would like to explain this thing we have been holding, this hat. It will go with your grief. (Willie Marks) Aawé. (George Dalton) Thank you. It will go back into Mt. Fairweather with your grief. (Iohn Wilson) Aawé. With those tears which fell from your faces it will go (Willie Marks) Thank you.

20

10

into your fathers' mountain.

(Unidentified) That's right. (Unidentified) Thank you.

--